



COMUNA DE DURGALI

PROVÌNTZIA DE NÙGORO

DELIBERATZIONE DE SA GIUNTA COMUNALE

N. 2 DE SU 25-01-2023

OGETU: Manifestatziones Carrasegare Durgalesu 2023 - Aprovatzione Programa, pranu de ispesa de màssima e Regulamentu isfilada carros allegòricos. Indiritzos a sos ufitzios.

S'annu duamìgia e vintitrès, su bintichimbe de su mese de ghenàrgiu a sas 13:00, in Durgali e in sa Domo Comunale, cunvocada a sos sentidos de lege, s'est riunida sa Giunta Comunale in sas persones de sos Sennores:

Testone Angela	Sìndiga	P
Fancello Antonietta	Assessora	P
Ruiu Gianmaria	Assessore	P
Mele Sonia	Assessora	P
Loi Silvia	Assessora	P
Carotti Bernardino Luigi	Assessore	A

Est presente a s'addòbiu sa sutascrita Vitze Segretària Comunale, Dut.ra Elena Rita Mereu

SA GIUNTA

Premìtidu chi fintzas pro su 2023 s'Amministratzione Comunale tenet in programa s'organizatzione de su Carrasegare Durgalesu, de realizare in collaboratzione cun sos vàrios assòtzios de voluntariadu e grupos folk presentes in su territòriu;

Cunsideradu chi totu sas iniciativas presas a su Carrasegare contribuint a mantènnere bia una tradizione de su logu e tenent dae semper unu sutzessu bonu comente pùblichu cun sa partetzipatzione de totu sa tzitadinàntzia;

Bidu su programa chi cumprendet paritzas iniciativas, dae sas màscaras traditzionales a s'isfilada de sas iscolas, a sos ballos in pratza cun sos sonadores de organeddu e a s'isfilada de sos carros allegòricos de sos giòvanos;

Cunsideradu chi su programa de su Carrasegare, cun sos eventos numenados in subra, meritat cunsensu e interessu pro su momentu culturale e sotziale chi rapresentat e resurtat coerente cun sos obietivos de promotzione e de crèschida sotziale espressados in su pranu istratègicu de s'amministratzione Comunale;

Cunsideradu, gasi etotu, chi pro una realizatzione de profetu de sas iniciativas de sas chi in subra, s'est ritènnidu pretzisu adotare formas de collaboratzione cun sos Assòtzios deputados in forma istituzionale a sa promotzione de su territòriu e de sas fainas cummertziales suas, balet pro pòdere contare cun sa collaboratzione de s'Assòtziu Turìsticu Pro Loco, chi s'at a pigare s'incàrrigu de ammaniare sas manifestatziones e su traballu de promotzione de sos eventos cumprèndidos in su programa;

Ritènnidu pretzisu pensare a una pianificatzione de màssima de su programa fintzas in contu econòmicu, pro permitere s'assunzione curreta de sos providimentos deretos a su contivìgiu de custu matessi e a sa promotzione sua;

Bidu su Regulamentu pro s'isfilada de sos carros allegòricos e de sos grupos de màscaras e su Regulamentu pro su concursu a prèmios ammaniadu dae sos ufitzios competentes;

Ritènnidu pretzisu aprovare sa proposta de programa ispetzificada in subra pro su Carrasegare 2023, e su pranu de ispesa de màssima chi li pertocat, disponende pro sa realizatzione de su programa ispiegadu in subra una summa totale pari a € 9.900,00 balende·si de sas resursas dispostas pro sos interventos pro su Turismu, e aderetare a s'Àrea de cumpetèntzia pro sos acumprimentos de esecuzione relativos, contende cun s'agiudu de s'Assòtziu Turìsticu Pro Loco;

Fatu riferimentu a:

sa deliberatzione Cunsiliare n 13 de su 12/05/2022, esecutiva dae deretu, cun sa chi est istadu approvadu su DUP periodu 2022/2024;

sa deliberatzione Cunsiliare n 14 de su 12/05/2022, esecutiva dae deretu, cun sa chi est istadu approvadu su Bilantzu de Previsione periodu 2022/2024;

sa deliberatzione G.C. nùmeru 41 de su 19 de maju 2022, chi giughet “Aprovatzione de su Pranu esecutivu de gestione periodu 2022/2024”;

Dadu atu de s’iscostiada a su 30 de abriale 2023 de su tèrmine pro s'adotzione de sa deliberatzione de su bilantzu de previsione 2023/25 de sos Entes locales, comente tennidu in contu dae s'artìculu 1, comma 775, de sa L. 197/2022 chi giughet Bilantzu de previsione de s'Istadu s'annu finantziàriu 2023 e bilantzu pluriennale 2023-2025, publicada in sa Gazeta ufiziale – sèrie generale n. 303 de su 29/12/2022;

Bidu s'art. 163 commas 3 e 4 de su Tuel;

Bidas sas previsiones agiornadas de su bilantzu 2022/2024- annu 2023”;

Bidu su parre favorèvole espressadu dae sos Responsàbiles de sos Servìtzios interessados a sos sentidos de s'art. 49, 1° comma, de su D. Lgvo N. 267 de su 18.08.2000;

Unànime

DELIBERAT

1. De approvare su programa de iniziatives “*CARRASEGARE DURGALESU 2022*”, a su cale in premissa inoghe s’intendet chi si faghet riferimentu de su totu, cun su fine de realizzare eventos de recreu e culturales in su periodu 9 – 26 de freàrgiu 2023, allegadu (A) a su presente atu pro nde fàghere parte integrante e sustanziale;
2. De destinare a s'atuamentu de su matessi programa s’importu totale de € 9.900,00, balende·si de sas resursas destinadas a sos interventos pro su Turismu;
3. De approvare su Regulamentu pro s'isfilada de sos carros allegòricos e de sos grupos de màscaras (allegadu B);
4. De approvare su Regulamentu pro sas manifestatziones ecuestres de su carrasegare durgalesu (allegadu C);
5. De dare mandadu a su Responsàbile Àrea Sòtziu-Culturale pro approvare e cuncordare unu protocollu de acordu cun a s'Assòtziu Turìsticu Pro Loco Durgali pro s'organizatzione de sos eventos de sos cales a su puntu 1 e pro finantziare s'ispeza chi nde benit;
6. De acumandare a sa Responsàbile Àrea Vigilàntzia s'incàrrigu pro s'essida de sos providimentos cunsighentes pro sa realizatzione de sas isfiladas e de sas manifestatziones ecuestres e de sos àteros eventos insertados in programma, assegurare sa signalètica de s'iscaminamentu de su tràficu e garantire su colare de mèdios eventuales de seguridade, sucursu e anti-fogu;
7. De acumandare a su Responsàbile de s'Ufitziu Tècnicu s'incàrrigu pro sos acumprimentos chi s'ighent pro sa posta in seguridade de su caminu interessadu pro sas manifestatziones ecuestres;
8. De dare atu chi su Comunu abarrat in foras de su disinnu de cada s'ingulu acontessimentu e chi duncas cada responsabilidade chi pertocat s'organizatzione e sa gestione de cada manifestatzione at a èssere pigada in capu a sos Assòtzios organizadores;
9. De dare atu chi sunt istados espressados sos parres allegados favorèvoles, a sos sentidos de su D. Lgs. n. 267/2000;
10. De rèndere sa presente, cun votatzione a bandas in unanimidade, esecutiva dae deretu a sos sentidos de s'art.134, 3° comma, de su D. Lgs. n. 267/2000.

Letu, approvadu e sutascritu.

Sa Sìndiga

Comunale F.to Dut.ra Angela Testone

Su Vitze Segretàriu

F.to Dut.ra Elena Rita Mereu

ATESTATZIONES E PARRES
(a sos sentidos de s'art. 49 comma 1 de su D.LGS. 267 de su 18.08.2000)

Parre in òrdine a sa Regularidade Tècnica	
Èsitu: Favorèvole Data: 25-01-2023	SU RESPONSÀBILE DE SERVÌTZIU F.to Maria Teresa Casula
Parre in òrdine a sa Regularidade contàbile	
Èsitu: Favorèvole Data: 25-01-2023	SU RESPONSÀBILE DE SERVÌTZIU F.to Dut.ra Elena Rita Mereu

TZERTIFICADU DE PUBLICATZIONE

S'ATESTAT chi sa presente deliberatzione, publicada a s'albu pretòriu informàticu de custu Comune de su 26-01-2023 a su 10-02-2023, est istada trasmìtida in còpia a sos Cabos de grupu Cunsiliares (a s'art. 125, c.1, de su D.Lgs 18/08/2000, n° 267) e at a devènnere esecutiva su 25-01-2023:

Su Vitze Segretàriu
Comunale F.to Dott.ssa Elena
Rita Mereu

Sa presente còpia est cunforma a s'originale.